



哥哥：（重複唱，如機器一樣）

從前如不羈的風不愛生根，我說我最害怕誓盟，
若為我痴心，便定會傷心，我永是個暫時情人，
曾揚言不羈的心只愛找開心，快慰過了便再獨行，
浪漫一生，盡力笑得真，掩飾空虛的心，
妳偏看透內心苦惱，妳以愛將心中空隙修補，
使這片風，願做妳的俘虜。
停住這風，Baby長夜抱擁Darling，
如今這個人，只想一生躺於妳身邊，
停住這風，Baby長夜抱擁Darling，
如今這個浪人，只想一生躺於妳呼吸側邊，
真愛，妳的真愛，令我講不出再見，
停住這風，Baby長夜抱擁，Darling停住這風。¹¹

（眾人更尖叫若狂）

阿文：你哋幾時先知會醒㗎？

Wilson：我哋唔會醒㗎啦，你走啦，繼續去搵嘉欣啦。

歐Sir：算啦，佢哋下一世都唔會醒㗎嘞，我哋行啦。

（三人退場，剩下Joanne、Wilson和哥哥繼續唱）



第五場：地獄第二層，囚籠地獄

（間場字幕：

*"Similmente a li splendor mondani
ordinò general ministra e duce*

*che permutasse a tempo li ben vani
di gente in gente e d'uno in altro sangue,
oltre la difension d'i senni umani;*

*per ch'una gente impera e l'altra langue,
seguendo lo giudicio di costei,
che è occulto come in erba l'angue."*

Dante, *Inferno*, canto 7

「同樣，他創造了管理地面繁榮的神，使金錢川流不息，

從這一雙手裏轉到那一雙手，

從這一個民族轉到那一個民族，並非人力所能轉移。

這一個做了主人翁，那一個做了奴隸兒，都是他的玩物。

他在冥茫之中，好俾躲在草叢裏的蛇。」

但丁《地獄》，第七篇，貪婪者與浪費者）

（二人來到另一層地獄，這裏都是一些籠子，裏面都住着一些人，他們的行為怪異，有些不停的打遊戲、有些不停在籠子裏旋轉、有些不停大聲講電話、有些甚至不停自慰。）

阿文：歐Sir，你講得冇錯，如果我當初睇唔開，我依家都會好似佢咁。但係我依家留嚟人世，又可以點樣呢？有好多問題都係解決唔到。

¹¹ 《不羈的風》，張國榮唱，曲：大管志幸，詞：林振強。



歐Sir：頭先嗰啲係你嘅過去，再落去嗰機層，係你依家嘅真實生活，你睇完之後，可能會有啲領會嘅。

阿文：歐Sir，你頭先話跟住嗰幾層，係我依家嘅現實生活。但係，點解呢度一啲都唔似嘅？

歐Sir：你唔好心急住，你睇清楚先講啦。

阿文：點解佢咁會咁？

歐Sir：呢度叫囚籠地獄，呢啲人長期被人困喺個籠度，慢慢就變成咁。

阿文：咁同我有咩似啊？

歐Sir：乜你唔覺得，你喺馬鞍山個間屋似個籠咩？

阿文：歐Sir，你咁講又誇張啲啫，我哋間屋雖然細，但係都不至於似個籠呀嘛？

歐Sir：你再行埋啲，睇吓佢咁做咩先講啦。

阿文：**（看到一個人在看電視）**咦，英超？喂，林伯特擺波啦。

電視迷：咩英超啊？**（按遙控一下）**

阿文：喂，我睇緊㗎？

電視迷：睇吓啲賠率先啦。

阿文：撤返過去啦，埋門啦。

電視迷：你自己搵過個籠啦，呢個係我㗎。

阿文：對唔住！

歐Sir：何浩文，呢度有個。

阿文：係㗎，好嘢。**（進去籠子裏開電視看）**嘩，唉呀，頭先嗰球入咗啊，邊個入㗎？係咪林伯特啊？俾啲慢鏡嚟睇吓啦。我罐啤酒呢，睇波有啤酒點掂㗎，喂，老婆，幫我嚟雪櫃擺罐嘉士伯㗎啦，凍啲嘅。

歐Sir：何浩文，你真係打算喺度睇埋佢啊？

阿文：喂，呢場係曼聯對車路士㗎。歐Sir，你以前都睇㗎。

歐Sir：咁你又記唔記得嗰日黃昏喺沙灘，你同你老婆講個番說話？

（台的另外一邊，年輕阿文跟嘉欣在沙灘上）

阿文：唔通我哋成世要住呢間豆腐𩶛？

嘉欣：未必嘅，如果你升咗職，或者我升咗，咪可以換層大啲嘅囉。

阿文：唉！你現實啲啦，就算我升到Manager咁又點啫，層樓依家跌咗咁多，我哋點甩身啊？

嘉欣：唔好諗咁多啦。

阿文：老婆！

嘉欣：唔？

阿文：其實，你有冇後悔同我結婚？

嘉欣：點會呢，傻嘅。我仲要同你生BB添。

阿文：好，生BB好呀！

嘉欣：老公，講樣嘢你聽。

阿文：唔？

嘉欣：我尋日睇醫生，原來我呢，有咗一個月。

阿文：啊，唔係啊嗎！

嘉欣：做咩啫，你唔開心咩？

阿文：乜咁唔小心啊！我哋呢間屋，點可以有小朋友㗎。

（沉默）

嘉欣：咁算啦，當我有講過。**（轉過頭）**

阿文：老婆，老婆，唔好鬍啦，我唔係咁嘅意思，不過，我哋真係養唔起。老婆。

（嘉欣生氣，跑出去，阿文追出去）

（小仙女在場外唱哀歌）

阿文：早知道你咁早死，我就一日做三份工，讀夜校博升職，買層大啲嘅樓俾你住。都係我有本事。

喂，點解電視冇咗嘢睇㗎，喂，我俾咗錢㗎㗎。

歐Sir：你要算賬，就搵佢咁算啦。

（歐Sir指着另一個籠，阿文一看，只見兩大胖子，賤肉橫生，身體都長滿膿瘡，發出陣陣臭味，但他們都衣着光鮮，看起來都像有錢人。他們其中一個不斷重複企圖穿襪子，但因為他的腳太肥腫，怎樣也穿不進去；另外一個不斷地吃東西，滿嘴巴都是食物，幾乎噏死，但仍控制不了自己不斷的吃。）

阿文：佢哋好臭。

歐Sir：係佢身上嘅爛肉同膿瘡發出嚟嘅臭味。

阿文：佢哋係咩人？

歐Sir：佢哋係控制呢個囚籠地獄嘅怪獸，你喺籠裏面得到嘅電